



## Aningaasanut Nunanullu Allanut Naalakkersuisoq

**Aningaasaqarnermut Ataatsimiititaliap suliaq nr. 01.31.06/07-00275 pillugu ulloq 24. september 2007-imi aalajangiinera pillugu Naalakkersuisunut ilisimatitsineq.**  
(Naalakkersuisut ulloq 10. september 2007-imi aalajangiineranni imm. 2b)

### Napasumi oqaluffiup iluarsaanneqarnissaa

Naalakkersuisut **inassutigaaat**,

- kontomi pingaarnermi 80.00.01-imi, Nuussinissanut sillimmatinut tunngasumi, aningaasaliissutit 2.950.000 koruuninik ikilineqassasut.
- kontomi pingaarnermi 84.45.01-imi, Ilagiinnut tunngasumi, aningaasaliissutit suliaasamat nr. 072.58.040-imut, Napasumi oqaluffimmik iluarsaassinermut tunngasumut, 2.950.000 koruuninik amerlineqassasut.

### Aningaasaqarnermut Ataatsimiititaliap oqaaseqaatai

Napasumi oqaluffiup iluarsaannissaanut Naalakkersuisut suliami matumani 3 mio. kr.-ingajaat qinnutigaaat. Taakkunanga 2,4 mio. kr.-it oqaluffiup qaliata isalersup iluarsaannissaanut atorneqassapput.

Aallaavittut isigalugu aningaasaliissuteqarnissamik matumanisut pisariaqartitsilerneq assut naapertuutinngitsutut Aningaasaqarnermut Ataatsimiititaliamit isigineqarpoq. Taamaalilluni piffissaagallartilugu iliuseqartarnissamik tunngaveqarnissaq malillugu illuutit aserfallatsaalineqarnissaannut aningaasanik immikkoortitsisimannginnerup aqutsisimannginnerullu qanoq kinguneqarsinnaaneranut suliaq manna takussutissaalluarpoq.

Tamatuma saniatigut pineqartutut annertussusilinnik ukiup taamaalinerani aningaasaliissuteqarnissamik pisariaqartitsinerit nutaat saqqummernerat assut ajuusaarnartutut ataatsimiititaliamit isigineqarpoq. Taamaalilluni tunngaviusumik isigalugu aningaasartuuteqarnissamik kissaat 2008-mut aningaasanut inatsisissatut siunnersuummut ilanngunneqarsimasariaqaralarpoq.

Qaliatali iluarsaannissaa pilertortumik pisariaqartutut isigineqarmat illup aserfallakkiartuinnarnissaa pinaveersaarniarlugu aningaasat qinnuteqaatigineqartut akuersissutigineqartariaqartutut ataatsimiititaliamit isigineqarpoq.

Aserfallatsaalisassanilli iluarsaassassanillu pingaarnersiulluni Kultureqarnermut, Ilinniartitaanermut, Ilisimatusarnermut Ilageeqarnermullu Pisortaqarfimmi pilersaarusiortarnerup pitsanngorsarneqarnissaanik pisariaqartitsineq suliami matumani ersarilluinnartumik ersersinneqartoq Aningaasaqarnermut Ataatsimiititaliaq isumaqarpoq. Taamaalillunilu Inatsisartunut ilaasortap Ruth Heilmannip § 36 naapertorlugu apeqqutaanut 2007/128-imut Naalakkersuisut akissuteqaataat naapertorlugu aserfallatsaaliinissamat aningaasaliissutinik Naalakkersuisoqarfimmi, tassungalu ilanngullugu ilageeqarnermut

tunngasuni pingaarnersiulluni tullerriiaarineq najoqqutassat makku malillugit pisartooq ataatsimiititaliap paasivaa;

1. Illuutit immikkoortuisa ilaasa silataasa aserfallatsaalinissaannut pilersaarutit,
2. Illuutini ussiiffiit pissutigalugit pilertortumik aserfallatsaaliinissat,
3. Iluarsaassinissat mikisualuit nalinginnaasut iluisalu aserfallatsaalinissaat,
4. Tamakkiisumik iluarsaassinissat,
5. Sananeqaatinik allannguinnissat mikinerusut, nutarterinissat pequtillu taarserneqarnissaat.

Sulialli matumani pineqartutut ittut oqaluffiup silataani qalianik iluarsaassinissamut 3 mio. kr.-inik aningaasaliissuteqarnissamik tassangaannartumik pisariaqartitsilernermik nassataqarsinnaasut pisartillugit najoqqutassat taakku kisimik aallaavigineqarsinnaanngitsut ersarippoq. Taamaalillunilu suliaq matumani pineqartoq tunngavigalugu ilagiit illutaannik iluarsaassinissamut aserfallatsaaliinissamullu pilersaarummik aalajangersimanerusumik ataatsimoortumillu suliaqartoqartariaqarpoq. Pilersaarut taanna meeqqat atuarfiannut pilersaarusiornermi periuseq atorlugu suliarineqarsinnaalluarpoq, tak. aningaasanut inatsimmi konto pingaarneq 84.40.10, Kommunini atuarfiit.

Ataatsimiititaliap isummersuutai suliani allassimasut suliaq matumani pineqartoq tunngavigalugu Naalakkersuisut isumaqatigigaat ataatsimiititaliamit naatsorsuutigineqarpoq.

1. Tamanna tunngavigalugu ilagiit illutaannut pilersaarut suliarilluagaq Naalakkersuisut qaqugu saqqummiutissavaat?
2. Ittoqqortoormiuni oqaluffik pillugu ilassutitut aningaasaliissuteqarnissamik qinnuteqaammik nassiussinissartik Naalakkersuisut naatsorsuutigigaat ataatsimiititaliap § 36 naapertorlugu apeqqut siuliani taaneqartoq naapertorlugu ilisimavaa. Tassunga atatillugu aningaasat qanoq amerlatigisut qinnuteqaatigineqarnissaat Naalakkersuisut naatsorsuutigaat aammalu ilageeqarnermi tunngasuni iluarsaassinissanik pisariaqartunik aningaasalersorneqarsimanngitsunik Naalakkersuisut ilisimasaqarpat?
3. Napasumi oqaluffiup iluarsanneqarnissaa pisariaqartinneqartoq Naalakkersuisut qanga ilisimaleqqaarpat?
4. Kultureqarnermut, Ilinniartitaanermut, Ilisimatusarnermut Ilageeqarnermullu Pisortaqaarfimmi aserfallatsaaliinissamut aningaasaliissutit kontomi pingaarnermi 40.01.06-imi, *Namminersornerullutik Oqartussat illuutaannik aserfallatsaaliuinermit tunngasumi*, immikkoortinneqartut ilaat qanoq amerlatigisut ilagiit illutaasa aserfallatsaalineqarnissaannut immikkoortinneqarpat?
5. Ilagiit illutaat aammalu Naalakkersuisoqarfiup illuutaasa sinneri illersorneqarsinnaasumik aserfallatsaalineqassappata aningaasat qanoq amerlatigisut 2007-imi aningaasanut inatsimmi aammalu 2008-mut aningaasanut inatsisissami immikkoortinneqarsimasariaqaraluarpat?
6. Ilagiit illuutaannik iluarsaassinissaq qanoq annertutigisumik kinguaattoorfiuva?
7. Ilagiit illuutaat qanoq annertutigisut eqqissimatitassatut eriagissassatullu nalunaarneqarsimasut, tamatumalu nassatarisaanik illut taakku aserfallatsaaliorneqarnissaannut immikkut aningaasaliissutinik immikkoortitsisoqarsimava?

8. Napasumi oqaluffimmik nutaavimmik sananissaq akikinnerusinnaasoq Naalackersuisut isumaliutigisimavaat, taamaattoqassappallu taanna qanoq akeqassangatinneqarpa?
9. Siunissami oqaluffinnik sanaartornissamik pilersaaruteqartoqartillugu innuttaasut akornanni aningaasanik siumut katersuiniarneq aqqutigalugu aningaasalersuutissat ilaat nassaariniarneqartariaqarnerat 2007-imi aningaasanut inatsisissatut siunnersuutip aappassaaneerpeqarnerani Aningaasaqarnermut Ataatsimiititaliami amerlanerussuteqartut kaammattuutigaat. Taamatut periuseqarneq ilagiit oqaluffimmik pisariaqartumik piginnittuunissaannut pitsaasuullunilu naleqquttoq, tamatumalu peqatigisaanik oqaluffimmik sanaartornermi aningaasartuutit najukkamilu inuiaqatigiit suliamik soqutiginnillutik akuunissaasa imminnut naapertuunnissaasa qulakkeerpeqarnissaanut naleqquttoq amerlanerussuteqartut oqaatigaat. Kaammattuut taanna Naalackersuisut qanoq qisuariarfigaat aammalu periusissatut ataatsimiititaliami amerlanerussuteqartunit kaammattuutigineqartoq Napasumut tunngatillugu suliami qanoq atorpeqarpa?
10. Aningaasat qinnuteqaatigineqartut 31.december 2007-imi aningaasanik Sanaartugassanut Iluarsagassanullu Aningaasaateqarfimmut nuunneqaannaratik tamakkiisut tamarmik nungullugit atorpeqarsinnaanerannik naliliinermi Naalackersuisut sunarpiaq tunuliaqutigaat?
11. Nuussinissamut sillimmatit saniatigut aningaasalersuutaasinnaasut allat Kultureqarnermut, Ilinniartitaanermut, Ilisimatusarnermut Ilageeqarnermullu Pisortaqaqfiup iluani avataanilu isumaliutigineqarsimappat?

Kiisalu Naatsorsueqqissaartarfik naapertorlugu Napasoq 1. januar 2007-imi 105-inik innuttaqartoq paasissutissiissutigineqassaaq.

Immikkoortumi aserfallatsaaliinermut aningaasaliussanik pingaarnersiulluni tulleriiaarisarnermut maleruagassanik pitsaanerusunik aalajangersaanissaq siunertaralugu Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisoqarfiup iluani aserfallatsaaliuinemik iluarsaanermillu suliassap tamakkiisup misissorneqarnissaanik Inatsisartut Kultureqarnermut Ilinniartitaanermullu Ataatsimiititaliaat Aningaasaqarnermut Ataatsimiititaliamit naggasiullugu kaammattorneqassaaq.

### **Aningaasaqarnermut Ataatsimiititaliap aalajangiinera**

Apeqqutinut siuliani allassimasunut kalaallisut danskisullu allaganngorlugu qarasaasiakkullu uunga nassiullugu; [nch@gh.gl](mailto:nch@gh.gl) akissuteqaammik sukumiisumik ullut 14-it qaangiutsinnagit Naalackersuisut nassiussinissaat tunngavissaatillugu Naalackersuisut inassuteqaataat Aningaasaqarnermut Ataatsimiititaliamit **akuersissutigineqarput**.

Inussiarnersumik inuulluaqqusillunga

Augusta Salling  
Aningaasaqarnermut Ataatsimiititaliap siulittaasua

Assilinera: Kultureqarnermut Ilinniartitaanermullu Ataatsimiititaliap

# Ineqarnermut Attaveqaqatigiinnermullu Ataatsimiititaliaq